

# A Tx'an

## YET IS YOX CARTA SAN JUAN

---

### Watx' k'anej chi al-lay yin cham Gayo

<sup>1</sup>Ayin ton anciano in chin tz'ibejtok jun in carta ti' ayach, ach wux'tak Gayo. Chach in came'ulnej yin masanil in c'ul.

<sup>2</sup>Ach wux'tak came'ulnebil, wojtak tol caw wal tec'an yak'on a nabal satak Dios. Chin txajli bay Dios oj, yet watx', watx'okabc'al chi ec' oj yin masanil tzet yetal, cax watx'okabc'al a c'ul, axca yak'on a nabal tu'. <sup>3</sup>A yet max ul yalon ec' eb juxtak tzetbil ayji ocok, caw wal max tzaloz aj in c'ul cayti', yujtol max yal eb tol caw wal ayoc a nabal yin cuybej acaw yel, cax asan ab jun cuybej yel ti' cha beybalnej. <sup>4</sup>A yet chi wabeni tol a eb max cha' Cristo wuj, ac'ala' beybalnen eb cuybej acaw yel, xan chin tzalozji. C'am junokxa tzet bay yel chi tzaloz in c'ul axca tu', yujtol axca tol wuninal yayji oc eb.

<sup>5</sup>Ach wux'tak came'ulnebil, watx' ton lanan oten a nabal bay tu' chi wabej. Chach ab colwaj bay eb juxtak, c'al bay eb janab, caxc'al man ojtakok eb, palta cayab tu' chot a c'ul yin eb. <sup>6</sup>Ay eb max alon satak iglesia ti', tol yel toni, tol ay a came'ulal bay tu'. Matawal chach colwajc'al bay eb, yet ay bay chi toj eb ec'jabok. Moj axcac'al tu' chot colwaj a ba bay eb, yujtol caytu' chi yochej Dios. <sup>7</sup>A eb tu', asan yuj yak'on serbil eb Jesucristo, xan chi ec' eb. C'am jabok tzet yetal chi cha' eb bay eb man creyenteok. <sup>8</sup>Yuj tu' xan co cuenta co colwaj bay eb. Ta chon colwaj bay eb, axca tol ayon jun lanan co mulnaj yetok eb, yet lanan yec' eb yalon el cuybej acaw yel.

### Is yob beybal Diótfefes

<sup>9</sup>Max in tz'ibejtok jun in carta ayex, mac ex che wajbaj e ba bay tu', palta axac'al Diótfefes chi yochej chex ikban bay tu'. A tzet chi jal ayon ti', c'am jabok yelapnok yul sat nak. <sup>10</sup>Yuj tu' xan a yet ok in apnok ayex tu', cax ok walon tzet

is mul nak, yujtol chi ec' naaj nak k'anej ayex jin. Man asannejok juntzan tu' chi yal nak, palta c'am chi cha' pax nak eb juxtak chi apni ayex tu'. Ilab ta ayex che yochej che cha' eb, chi tit yowal nak e yin, toltax chech yuktej el nak xol iglesia tu'.

<sup>11</sup>Ach wuxtak came'ulnebil, manchak a beybalnej beybal eb man watx'ok is beybal. Asan beybal eb watx' cha beybalnej. Ta watx' chi jut co ba, tita' tol yet onxa Dios chi yal tu'. Palta a pax mac man watx'ok chi yut ba, man ojtakbilok Dios yuj.

#### **Is watx' beybal Demetrio**

<sup>12</sup>Axa pax juxtak Demetrio, watx' ab yul sat eb masanil, yujtol miman txequel tol lanan yiken jun cuybej a caw yel. Ilab on ti' c'apaxok, watx' nak yul co sat. E yojtak tol yel tzet chi jala'.

#### **Chi toj cawil c'ul yuj Juan**

<sup>13</sup>Xiwiltoc'al tzet yetal chi wochej chi waltok ayach, palta maj in tz'ibejtok yul jun in carta ti'. <sup>14</sup>Yujtol chin na', tol chok wal je' ach toj wiloni, cax ato yet tu' chin watx' alnejcan juntzanxa tzet yetal tu' ayach.

<sup>15</sup>Ayokab a junc'ulal bay tu'. Chi yatok eb creyente cayti' cawil a c'ul. Ti chi ja c'apaxtok cawil c'ul eb creyente bay tu'.